

通園叢書

張宗祥



通國書

楊文



唐大詔令集卷第四十九

宋 宋敏求編

大臣

宰相

命相六

舒元興李訓平章事制

鄭覃平章事制

李石平章事制

李固言平章事制

陳夷行平章事制

楊嗣復李珣平章事制

裴度中書令制

崔鄆平章事制

崔珙平章事制

杜悰平章事制

李回平章事制

崔鉉魏扶平章事制

崔龜從平章事制

魏謩平章事制

裴休平章事制

舒元興李訓平章事制

出納王命流品眾職覃理化於區夏謹法度於巖廊是有文

可經邦才推濟代列於百辟之上俾輝三台之光今我夢勞
果獲惟肖爰舉並命以寵非常朝議郎守御史中丞兼刑部
侍郎上柱國賜紫金魚袋舒元興杞梓長材金玉正信道懷
邴魏詞瞻菁英居然不器之能雅蹈中庸之美自擢領綱紀
肅清朝廷碩望允歸於應期讜言莫匪乎體國守兵部郎中
知制誥充翰林學士賜緋魚袋李訓軒纓鼎族河嶽閒賢德
茂皋夔文含雅誥窮易測象繫之表吐論成邦國之經洎參
職內庭發揮王度盛業見乎造膝明識藹於伏蒲並沖敏執
中端粹不倚咸蘊莫磷之志克弘作礪之規珪璋有聲鸞鳳
有采朕常法宮高視所寶惟賢方清化源遂得時傑嗚呼君
執象以端辰臣推公以秉鈞夙夜一心小大同體則和天地

序陰陽臻乎治平吾所寢寤爾宜率匡國之道明理人之方
俾其致君無媿往烈咸陟樞柄佇弘大猷秋官禮闈莫非寵
任祇厥成命往惟欽哉往者朕究大易音訓之義也尙未終
卷政事之暇宜三兩日一度入翰林元輿可守尙書刑部侍
郎同中書門下平章事訓可守尙書禮部侍郎同中書門下
平章事仍賜紫金魚袋

大和九年九月

鄭覃平章事制

歸融

朕嗣守丕圖務弘至理憂勤是切宵旰靡遑所以庶政萬機
悉委丞相乃者失於任使妖沴遽生方思正人參我大柄銀
青光祿大夫守尙書右僕射上柱國滎陽郡開國公食邑二
千戶鄭覃天資直氣嶽降上才性惟端莊道本孤峻文含風

雅學洞儒玄通古今理亂之源達教化損益之要歷踐華貫
周旋大僚休問彰於搢紳政事滿於臺閣載居講席密勿內
庭胸襟洞開肝膈無隱嘗奏讜議發言有先見之明每勵貞
規勇退守獨立之節洎擢膺揆務總領庶言堅操不回墜典
皆舉盡瘁憂國竭忠戴君必能毗予一人康濟四海邪正之
路旣別清濁之流自分於戲秉茲鈞衡委乃髦碩爾其使萬
事得其序百官得其人用賢罔不精立法罔不慎弼亮刑政
變和陰陽其聽朕言往踐厥位克紹先德巖廊有光可守本
官同中書門下平章事散官勳封如故

大和九年十一月

李石平章事制

朕嗣位君臨精求至道日愼一日於今十年所期輔佐之臣

爲我致理中立匪懈知無不爲今得其人果副僉屬朝議郎
尙書戶部侍郎判度支上柱國賜紫金魚袋李石操履堅貞
志業弘茂性合道要識通化源累佐藩方備聞勲績用司夕
拜之任旋加尹正之榮爰委賦征備宣試效是宜擢膺輔弼
俾勵政經爾當勤成務之規率致君之道內貞百度外靖四
方參毗萬幾課程庶績盡匪躬之節竭宣力之能大振朝綱
兼司國計致億兆之庶富成方夏之乂安副予知臣勉茂休
烈可朝議大夫守本官同中書門下平章事仍依前判度支
勲賜如故

大和九年十一月

李固言平章事制

自昔皇王之有天下也君非臣罔以濟其理臣遇君然後顯

其才以調陰陽以承法度雖堯舜不能自聖雖皋夔不能自
賢君臣相需今古同體余之夢卜實有慕焉檢校兵部尚書
兼興元尹御史大夫山南西道節度使管內觀察處置等使
李固言稟河岳之上靈孕乾坤之間氣孤迥獨立公忠自持
擅菁英之雄文洞旨要之奧學仁歸信厚動合典謨巖廊正
人中外全德官業夙望殷乎華夷歷居大僚咸稱厥職乃者
擢自輔相委之樞衡不依違而徇人每精恪以憂國匪躬而
謇諤彌勵絕私而節操不渝洎仗鉞漢中頒我條詔端嚴以
訓齊師律寬惠以綏撫蒸黎遂用徵還俾副公議召至宣室
前席與言聽其誠詞皆臻理化是宜再參大柄正位黃樞爲
朝廷之股肱聳搢紳之耳目康濟四海毗予一人是非罔及

於愛憎任用必分其清濁有犯無隱進思弼違勿忝吾知更

光爾道可守門下侍郎同中書門下平章事

開成元年四月

陳夷行平章事制

王者任賢能所以緝熙庶績舉正直期乎獻可弼違苟非懋茲四德何以光膺大任翰林學士將仕郎守尚書工部侍郎知制誥兼太子侍讀上騎都尉賜紫金魚袋陳夷行元精降靈厚載儲祉聚蓄英粹作時休祥懷道清貞執德謙茂行高嵩華弘苞容之偉量明洞水鏡韜妍媸於默識貞己滋潔遇物能容雖牆岸孤峻襟抱夷曠孝友爲修己之具文學誠潤身之餘眾推全才時號端士頃在廊署雅有名稱是用擢居襟密俾輔導元良論辨見賢人之業教諭得名臣之體星琯

屢改才術彌彰古稱旁求夢卜曷若選之於言行是用付以政柄登於台階任茲鈞衡之重處以臯夔之秩人所注意予將仰成勉陳啟沃之術以副具瞻之望可守本官同中書門下平章事散官勳賜如故

開元二年四月

楊嗣復李珣平章事制

運行帝載翊贊天工必俟輔臣以宣至化將益秉鈞之重是資並命之求諸道鹽鐵轉運等使正議大夫守戶部尚書上柱國弘農郡開國伯食邑七百戶賜紫金魚袋楊嗣復動必居正言惟在公峻若孤山清猶止水從政稟詩書之教承家達禮樂之源朝議郎守戶部侍郎判戶部事上柱國賜紫金魚袋李珣質本溫明才推俊茂智能周物弘本有容守和爲

君子之儒可大見賢人之業挺爲國傑秀稟元精生必爲時
寶稱希代便蕃清秩操履有常調黃鍾而協諧和朱絃而疏
越或總重鎮敷惠字人卒乘有輯睦之功惇嫠著昭蘇之詠
洎入司邦賦爰掌版圖事未裁成公望猶鬱是可以宰領樞
務用弼予違敘彝倫而建大中罄訏謨而調元氣又寧華夏
保合神人宜申補袞之規致我垂衣之理於戲孔明匡鼎峙
之國尙聞魚水之詞夷吾輔霸業之君猶致鴻翼之喻矧予
祇荷丕構雖未克紹前修造次之間不忘遵道宵衣旰食一
紀於茲災沴尙生於旱蝗黎元屢困於衣食中夜靜慮若涉
大川將求津涯俟爾而濟爾謂是靡以拂吾心而不行爾謂
非靡以徇吾志而苟用開物成務俾乂於得時求賢審官寧

我以多士則魚水鴻翼夫何足言勉副簡求無忝我休命嗣
復可守本官同中書門下平章事依前充諸道鹽鐵轉運使
勳賜如故珏可守本官同中書門下平章事依前判戶部事
散官勳賜如故

開成三年正月

裴度中書令制

緝熙政柄亮采皇猷弘道德而輔昌圖調陰陽而平景緯我
惟求舊人亦與能正位合階實資元老河東節度觀察處置
等使開府儀同三司守司徒兼中書令太原尹北都留守上
柱國晉國公食邑三千戶實封三百戶裴度星辰稟秀山嶽
炳靈文蔚采章量苞江海負經邦之遠略懷許國之明誠研
幾而識洞著龜運籌而道光竹帛風雨一致儀刑四朝萬邦

所瞻百辟爲憲洎揚旌雁塞建旆龍山謹管籥而戎索煙清
壯襟帶而軍牙氣肅虜絕南牧聲雄北門懿茲殊庸朕所嘉
歎是用專授衡軸俾清化源統和神人茂育區夏夫宰相之
任作予股肱外可以懷柔四夷內可以親附百姓大可以贊
亨毒阜生成小可以激貪廉正雅俗爾有休躅予不重言至
於玉立巖廊風行號令端若植表爲時指南開予胸襟端我
視聽實賴人傑代茲天工爰罷麾幢再操舟楫庶展乞言之
禮豈惟論道之尊佇竭訃謨無虛毗倚可守司徒兼中書令
散官勳封如故

開成三年十二月

崔鄆平章事制

朕丕承寶圖思臻古理小大之政皆倚輔臣選眾惟難得人

而授中大夫守太常卿上柱國賜紫金魚袋崔鄆天資正性
岳降瓊材愼楊震之四知邁皋陶之九德抱負直質秀發英
華動必蹈中言皆體要聚學每同於精蹟馳騁九流摘文若
奏乎笙簧抑揚三代鴻量難挹懿聲自高乃者入典訓詞出
司俊造能用周密靡混妍蚩銓總以明允爲先廉察以澄清
爲重踐乃要職顯有休功秩宗之選方登公台之論彌鬱由
是酌其望實付以鈞衡恢予之規模廣予之耳目於戲宰相
之任弼諧是資予欲使六氣均調惟爾贊予欲使萬方平乂
惟爾謨予欲使臣寮得職惟爾諧予欲使邪正不亂惟爾翼
言罔慮於咈耳進無忘於沃心貞觀開元之法度具存房魏
姚宋之規猷盡在咨爾丞相舉而行之可守本官同中書門

下平章事散官勳封如故

開成四年七月

崔珙平章事制

一日萬機熙帝載者輔相予違爾弼成台德者股肱天將瑞
時必有人傑況當出震之日實藉濟川之才諸道鹽鐵轉運
使銀青光祿大夫守刑部尚書上柱國崔珙應期而生希代
之寶量涵海嶽明並日星懷倜儻之奇姿抱英邁之正氣挺
質而珪璋比德影纓而冠蓋盈門立言每見於經邦行己諒
先於及物早持旄節亟踐崇壇柔獷悍爲忠義之心變封疆
爲禮樂之俗信入人腹令行軍牙及尹正神州儀刑郡國剛
能嫉惡明可照姦三輔弘取則之風四方稟承流之化迨司
筦權益茂器能精若鑑金利逾淬刃歲以饒羨國用富強懿

乃成功允諧選眾是宜亮采皇極涉降台階調陰陽於至和
濟生靈於將泰四維咸舉百度以貞俾時式康佐朕爲理夫
周以豕宰制國用漢以丞相調兵食猶怙牢盆之務往居鈞
軸之尊於乎后德惟臣良臣惟聖汝其納誨予亦踐言克符
魚水之資永贊文明之運服茲休命敬之敬之可守本官同
中書門下平章事依前充諸道鹽鐵轉運等使

開成五
年五月

杜棕平章事制

朕顧惟眇身纘承大構思有以允釐百事表率萬邦進髦傑
於台階庶緝熙於帝業布誠聽問側席眷求爰於岳牧之中
載叶蒼龜之兆乃舉成命以副具瞻淮南節度副大使知節
度事充諸道鹽鐵轉運等使光祿大夫檢校尚書右僕射杜